

pas ma sœur, que ie n'aille pas avec elle: c'estoit sa sœur ainée, qui depuis quelques iours estoit morte malheureusement, ayant refusé le baptesme: sans doute celle-cy ne la suiuit pas, car elle le receut faintement. Ce sont des bontez ineffables de Dieu, qui veut accroistre de la sorte là haut dedans le ciel l'Eglise qui y triomphe.

Maintenant pour parler de cette Eglise militante, nous auons veu, à nostre grand regret, durant le cours de cette maladie, la nature du fol sur lequel elle estoit bastie: c'estoit fable pour la pluspart, les vents & les orages ont quasi tout ietté par terre. C'est vne chose difficile à adoucir que la perte de la vie, où de celle de ceux d'où elle depend, sur tout a des barbares qui depuis deux & trois mille siecles n'auoient iamais eu la pensée qu'il y eust d'autre bien que celui de la vie presente; de là se fait que les choses du ciel ne sont quasi aucune impression sur leur esprit, que pour le temps de la prosperité: car aussi tost qu'il se rencontre [91] quelque chose qui heurte l'estat de la vie presente, à peine peuuent-ils se tenir qu'ils n'ayent recours à leurs danses & festins, à l'obseruance de leurs songes, & autres inuentions diaboliques, dont ils esperent tirer quelque secours. La crainte publique que nous estions la cause de leur misere s'emparant en fuite de leurs esprits, & la crainte d'estre compris dans le massacre general dont nous estions continuellement menacez: toutes ces choses ont fait que plusieurs qui auoient professé la foy les années precedentes, non seulement sont retournez à l'usage de leurs anciennes superstitions, mais encore ont tesmoigné publiquement qu'ils renouoient à ce qu'ils auoient embrassé.